

U skladu sa tačkom 12. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 37/24), a u vezi s Odlukom o izvršavanju Budžeta Grada Tuzle za 2025. godinu („Službeni glasnik Grada Tuzla“, broj 3/25), na osnovu tačke I i tačke II, podtačka 3. Pravilnika o utvrđivanju uslova, kriterija i postupka dodjele nepovratnih sredstava za novčanu podršku privrednim subjektima na području grada Tuzle („Službeni glasnik Grada Tuzla“, broj 2/19, 8/21 i 10/25), Služba za ekonomski razvoj, poduzetništvo i poljoprivredu, donosi

PROGRAM

**utroška sredstava iz Budžeta Grada Tuzle za 2025. godinu namijenjenih za podršku
privatnim preduzećima i poduzetnicima po Projektu „Siguran start“**

1. UVOD

Ovim Programom reguliše se način utroška navedenih sredstava, ciljevi koji se žele postići, kriteriji za izbor korisnika podrške u okviru ovog Programa, iznos podrške za sve linije odnosno oblike podrške predviđene Projektom „Siguran start“, kao i druga pitanja bitna za realizaciju predmetnih sredstava.

U Budžetu Grada Tuzle za period od 1.1.-31.12.2025. godine („Službeni glasnik Grada Tuzle“, broj 3/25), u organizacionoj jedinici Služba za ekonomski razvoj, poduzetništvo i poljoprivredu, u dijelu izdataka fonda sredstava od naknade za prihode ostvarene radom termoelektrana, planirana su sredstva na poziciji - Grant za podršku privatnim preduzećima i poduzetnicima, ekonomski kod: 0406/614511-1, u iznosu od **245.000,00 KM**.

Pored toga, u Budžetu Grada Tuzle za period od 1.1.-31.12.2025. godine („Službeni glasnik Grada Tuzle“, broj 3/25), u organizacionoj jedinici Služba za ekonomski razvoj, poduzetništvo i poljoprivredu, u dijelu budžetskih sredstava, planirana su sredstva na poziciji - Grant za podršku privatnim preduzećima i poduzetnicima, ekonomski kod 0401/614511-1, u iznosu od **90.000,00 KM**.

Na osnovu prethodnih naznaka o planiranim sredstvima ovim Programom utroška sredstava iz Budžeta Grada Tuzle za 2025. godinu namijenjenih za podršku privatnim preduzećima i poduzetnicima po Projektu „Siguran start“ (u daljem tekstu: Program), budžetska sredstva iz prethodna dva stava, u ukupnom iznosu od **335.000,00 KM**, rasporedit će se putem sljedećih linija podrške:

- 1.1.** Podrška novoregistrovanih subjekata koji su djelatnost registrovali na području grada Tuzle u 2025. godini.
- 1.2.** Podrška subjekata koji su djelatnost registrovali na području grada Tuzle u u 2024. godini.

2. PRAVNI OKVIR ZA PROVOĐENJE PROGRAMA

- Strategija razvoja grada Tuzla do 2026. godine;
- Dokument okvirnog Budžeta Grada Tuzla za period 2025-2027. godina;
- Budžet Grada Tuzle za 2025. godinu („Službeni glasnik Grada Tuzla“, broj: 3/25);
- Odluka o izvršavanju Budžeta Grada Tuzla za 2025. godinu („Službeni glasnik Grada Tuzla“, broj: 3/25);
- Pravilnik o utvrđivanju uslova, kriterija i postupka dodjele nepovratnih sredstava za novčanu podršku privrednim subjektima na području grada Tuzle („Službeni glasnik Grada Tuzla“, broj 2/19, 8/21 i 10/25).

3. CILJ PROGRAMA

Cilj ovog Programa je da se u okviru raspoloživih sredstava na poziciji Grant za podršku privatnim preduzećima i poduzetnicima u Budžetu Grada Tuzle za 2025. godinu podrži očuvanje i sigurnost u prvoj godini poslovanja, privatnih poduzetničkih firmi novoregistrovanih u 2025. godini, te isto tako da se osigura podrška za subjekte koji su registrovani u 2024. godini, koji su također rizični u obstojnosti i stabilnosti poslovne aktivnosti i jednako trebaju podršku kao i novoregistrovani subjekti u prvoj godini rada.

Ovim mjerama koje u kontinuitetu realizuje Grad Tuzla nastoji se pozitivno djelovati i stimulisati registrovanje novih subjekata te podržati opstanak novoregistrovanih subjekata u prvoj i drugoj godini rada te na taj način posredno doprinijeti novom zapošljavanju odnosno samozapošljavanju na području grada Tuzle u privatnom poduzetničkom sektoru.

Očekivani ishod nakon realizacije ovog Programa je novčana podrška za minimalno oko 160 subjekata, odnosno samostalnih djelatnosti i/ili privrednih društava s područja grada Tuzle, registrovanih u 2025. i 2024. godini, čime će se doprinijeti zapošljavanju odnosno samozapošljavanju i očuvanju radnih mjesta za najmanje oko 160 osoba.

Uz to, realno je očekivati i veće efekte ovog Programa ako se uzme u obzir da će u podržanim subjektima biti uposlen određeni broj radnika spram ukazanih potreba u procesu rada.

4. OBLICI PODRŠKE I IZNOS PODRŠKE U PROJEKTU „SIGURAN START“

4.1. Sredstva koja su predmet ovog Programa dodijelit će se samostalnim poduzetničkim djelatnostima u vlasništvu fizičkih osoba koji djelatnost obavljaju kao osnovno zanimanje na području grada Tuzle, te privrednim društvima u privatnom vlasništvu, registrovanim na području grada Tuzle i to putem sljedećih oblika podrške predviđenih u projektu „Siguran start“, jednoj od redovnih mjera direktne podrške u sektoru poduzetništva koju realizuje Grad Tuzla:

- refundiranje/finansiranje troškova obaveznih doprinosa za PiO i zdravstveno osiguranje i osiguranje od nezaposlenosti, za vlasnika samostalne poduzetničke djelatnosti registrovane u 2025. godini, za period od registracije pa do 31.12.2025. godine, a za vlasnika samostalne djelatnosti registrovane u 2024. godini, za period od 1.1. do 31.12.2025. godine,
- sufinansiranje do 50% troškova zakupa poslovnog prostora u kojem subjekat obavlja djelatnost, i za samostalnu poduzetničku djelatnost ili privredno društvo registrovano u 2025. godini, kao i za samostalnu djelatnost ili privredno društvo registrovano u 2024. godini,
- sufinansiranje nabavke neophodne opreme i sredstava za rad registrovanog subjekta do 50% vrijednosti nabavljene opreme, i za samostalnu poduzetničku djelatnost ili privredno društvo registrovano u 2025. godini, kao i za samostalnu poduzetničku djelatnost ili privredno društvo registrovano u 2024. godini. Nabavljena sredstva ili oprema mora biti nova odnosno nekorištena i kupljena u 2025. godini,
- sufinansiranje/finansiranje ugovorenih poslovnih usluga (računovodstvenih, pravnih, usluga marketinga, informatičkih, finansijskih i sl.) i za samostalnu poduzetničku djelatnost ili privredno društvo registrovano u 2025. godini, kao i za samostalnu poduzetničku djelatnost ili privredno društvo registrovano u 2024. godini.

4.2. Zainteresirani aplikanti mogu aplicirati na jedan ili više predviđenih oblika podrška iz tačke 4.1. ovog Programa, s tim da ukupan iznos obračunate podrške ne može prelaziti iznos od **2.500,00 KM**, za subjekte registrovane u 2025. godini, a za subjekte registrovane u 2024. godini. ne može prelaziti iznos od **1.500,00 KM**.

4.3. Privatnim preduzećima i samostalnim poduzetničkim djelatnostima iz tačke 4.1. ovog Programa, čiji je vlasnik/direktor iz kategorije: mlada osoba u dobi od 18-35 godina, obračunati iznos podrške iz tačke 4.1, kao i maksimalni iznos novčane podrške iz tačke 4.2, uvećava se za 10%.

- 4.4. Privatnim preduzećima i samostalnim poduzetničkim djelatnostima iz tačke 4.1. ovog Programa, čiji je vlasnik/direktor iz kategorije: osoba ženskog spola, obračunati iznos podrške iz tačke 4.1, kao i maksimalni iznos novčane podrške iz tačke 4.2, uvećava se za 5%.
- 4.5. Ukoliko subjekat pripada kategoriji korisnika i pod tačkom 4.3. i pod tačkom 4.4. ovog Programa, predviđena uvećanja iznosa podrške, iz tačke 4.3. i tačke 4.4, se sabiraju.

5. KRITERIJI ZA IZBOR KORISNIKA NOVČANE PODRŠKE

Pravo na apliciranje za dodjelu sredstava iz ovog Programa mogu ostvariti samostalne poduzetničke djelatnosti u vlasništvu fizičkih osoba koji djelatnost obavljaju kao osnovno zanimanje na području grada Tuzle i privredna društva u privatnom vlasništvu registrovana na području grada Tuzle, koji su prvi put registrovani u 2025. godini, te subjekti koji su registrovani u prethodnoj 2024. godini.

Aplikanti, koji iako ispunjavaju kriterije iz prethodnog stava, bit će isključeni iz daljeg učešća u javnom pozivu ili iz daljeg postupka dodjele sredstava na ime novčane podrške, ako su u trenutku raspisivanja javnog poziva:

- krivi za davanje lažnih informacija u prijavnom obrascu koje su preduslov za učestvovanje u pozivu za dodjelu novčane podrške ili ako nisu dostavili potrebne informacije;
- imali neizmirenih obaveza iz prethodno sklopljenih ugovora o odobravanju novčane podrške iz sredstava Budžeta Grada Tuzle.

Za dodjelu novčane podrške ne mogu aplicirati subjekti koji imaju status javne ustanove ili javnog preduzeća, neprofitne organizacije i drugi subjekti u vlasništvu bilo kojeg nivoa vlasti u Bosni i Hercegovini.

6. NADLEŽNA SLUŽBA ZA PROVOĐENJE PROGRAMA

Za provođenje ovog Programa i praćenje namjenskog korištenja sredstava od strane korisnika dodijeljene novčane podrške nadležna je Služba za ekonomski razvoj, poduzetništvo i poljoprivredu Grada Tuzle.

7. SREDSTVA PREDVIĐENA ZA RASPODJELU

Ukupno planirana sredstva na budžetskoj poziciji Grant za podršku privatnim preduzećima i poduzetnicima u Budžetu Grada Tuzle za 2025. godinu, iznose ukupno 335.000,00 KM. Ista su raspoloživa za raspodjelu putem dvije linije podrške predviđene u tački 1. ovog Programa i dodijeliti će se putem javnog poziva.

8. TRAJANJE PROGRAMA UTROŠKA

Dodijeljena sredstva iz tačke 7. ovog Programa korisnici su dužni utrošiti najkasnije do 31.12.2025. godine.

Korisnici dodijeljene novčane podrške su dužni opravdati dodijeljena sredstva najkasnije do 31.1.2026. godine.

9. PROVOĐENJE PROGRAMA

Na snovu ovog Programa, u skladu s Pravilnikom o utvrđivanju uslova, kriterija i postupka dodjele nepovratnih sredstava za novčanu podršku privrednim subjektima na području Grada Tuzla („Službeni glasnik Grada Tuzla“, broj 2/19, 8/21 i 10/25), Služba za ekonomski razvoj, poduzetništvo i poljoprivredu raspisat će javni poziv za dodjelu sredstava na ime novčane podrške privrednim društvima i samostalnim poduzetničkim djelatnostima u vlasništvu fizičkih osoba po Projektu „Siguran start“, za dodjelu sredstava putem linije u podtački 1.1. ovog Programa, koja obuhvata subjekte registrovane u 2025. godini, te putem linije u podtački 1.2. ovog Programa, koja obuhvata subjekte registrovane u 2024. godini.

Javni poziv će biti objavljen na zvaničnoj internet stranici Grada Tuzle i na oglasnoj ploči Grada Tuzle.

Javni poziv će biti otvoren 21 dan od dana objavljivanja.

Prijave na javni poziv podnose se na prijavnom obrascu koji će pripremiti Služba za ekonomski razvoj, poduzetništvo i poljoprivredu a koji će se moći preuzeti na zvaničnoj internet stranici Grada Tuzle (www.grad.tuzla.ba) i u Centru za pružanje usluga građanima (šalter sala Grada Tuzla).

Uz popunjen prijavni obrazac, aplikanti su obavezni dostaviti dokumentaciju propisanu tačkom VII Pravilnika o utvrđivanju uslova, kriterija i postupka dodjele nepovratnih sredstava za novčanu podršku privrednim subjektima na području Grada Tuzla ("Službeni glasnik Grada Tuzla", broj 2/19, 8/21 i 10/25), koja se odnosi na ostvarivanje prava na novčanu podršku iz ovog Programa, a bit će navedena u javnom pozivu i u prijavnom obrascu kao sastavnom dijelu javnog poziva.

10. POSTUPAK DODJELE SREDSTAVA

Postupak dodjele sredstava privatnim preduzećima i poduzetnicima na ime novčane podrške putem ovog Programa provodi Komisija za ocjenu prijava (u daljem tekstu: Komisija), koju imenuje Pomoćnik Gradonačelnika za Službu za ekonomski razvoj, poduzetništvo i poljoprivredu.

Komisiju čine predsjednik i dva člana. Rješenjem o imenovanju Komisije za ocjenu prijava imenovat će se zamjena za predsjednika i dva zamjenska člana Komisije.

U Komisiju će se imenovati dva uposlenika Službe za ekonomski razvoj, poduzetništvo i poljoprivredu i jedan predstavnik Udruženja obrtnika grada Tuzle ili Savjeta Gradonačelnika za lokalni ekonomski razvoj.

Komisija za ocjenu prijava će sukcesivno nakon objave javnog poziva vršiti pregled i ocjenu zaprimljenih prijava te će po okončanju postupka ocjenjivanja sačiniti listu o odabiru korisnika. Lista o odabiru korisnika mora sadržavati subjekte koji su ispunili uslove javnog poziva sa predloženim iznosom sredstava, kao i subjekte koji nisu ispunili uslove javnog poziva sa naznakom koji uslov nije ispunjen.

Ukoliko se nakon pregleda i ocjene svih zaprimljenih prijava sa iznosom pojedinačne podrške koja pripada korisniku utvrdi da je ukupan iznos odobrene podrške veći od iznosa sredstava za raspodjelu Komisija će linearno umanjiti pojedinačne iznose podrške svim korisnicima u jednakom procentu kako bi se uskladio iznos odobrene podrške sa iznosom raspoloživih sredstava za raspodjelu.

Lista o odabiru korisnika sa iznosom podrške se objavljuje na zvaničnoj internet stranici Grada Tuzle (www.grad.tuzla.ba) i na oglasnoj ploči Grada Tuzle.

Nezadovoljni podnosioci prijava na javni poziv iz ovog Programa mogu podnijeti prigovor na listu o odabiru korisnika u roku od pet dana od dana objave liste na zvaničnoj internet stranici Grada Tuzle. Prigovor razmatra drugostepena komisija koju će imenovati Pomoćnik gradonačelnika za Službu za ekonomski razvoj, poduzetništvo i poljoprivredu.

Po okončanju postupka po prigovoru, Komisija na zvaničnoj internet stranici Grada Tuzle objavljuje Konačnu listu o odabiru korisnika, na koju više nije dozvoljeno podnošenje prigovora.

Nakon okončanja postupka Komisija o svom radu sačinjava zapisnik koji zajedno sa Konačnom listom o odabiru korisnika i prijedlogom iznosa novčane podrške dostavlja Službi za ekonomski razvoj, poduzetništvo i poljoprivredu na dalje postupanje.

Na osnovu izvještaja o radu Komisije i Konačne liste o odabiru korisnika Služba za ekonomski razvoj, poduzetništvo i poljoprivredu donosi program raspodjele sredstava. Program raspodjele sredstava objavljuje se na zvaničnoj internet stranici Grada Tuzle (www.grad.tuzla.ba).

Detaljni uslovi korištenja dodijeljenih sredstava regulisat će se ugovorom koji će se zaključiti između Službe za ekonomski razvoj, poduzetništvo i poljoprivredu, s jedne strane i korisnika sredstava, s druge strane.

11. KONTROLA UTROŠKA SREDSTAVA

Kontrolu namjenskog utroška dodijeljenih i uplaćenih sredstava i izvršavanje ostalih ugovornih obaveza vršit će Služba za ekonomski razvoj, poduzetništvo i poljoprivredu, putem komisije za praćenje utroška i realizacije ugovornih obaveza korisnika novčane podrške, na osnovu dokumentacije koju će dostavljati korisnici novčane podrške, a koja se odnosi na oblik podrške za koji su dodijeljena sredstva korisniku.

Ukoliko se ukaže potreba predstavnici Službe za ekonomski razvoj, poduzetništvo i poljoprivredu izvršit će kontrolu provođenja ugovornih obaveza neposredno kod korisnika novčane podrške.

U slučaju utvrđivanja nenamjenskog utroška doznačenih sredstava i nepoštivanja ugovornih obaveza pokrenut će se postupak raskida ugovora i povrata nenamjenski utrošenih sredstava u Budžet Grada Tuzle.

12. STUPANJE NA SNAGU PROGRAMA

Ovaj Program stupa na snagu danom donošenja i ne objavljuje se u „Službenom glasniku Grada Tuzla“, a objavit će se na zvaničnoj internet stranici Grada Tuzle.

Dokument pripremila: Dijana Dizdarević.

Broj: 04/11-A-14/69-2025
Tuzla, 5.9.2025. godine

Pomoćnik Gradonačelnika
za Službu za ekonomski razvoj, poduzetništvo i poljoprivredu
Alma Hatilović, dipl.ecc.

